

**Naqqiut**

Saqqummiussissut 27. april 2017 ullulerneqartoq taarserpaa  
(*Siunnersuuteqartup allanngortinnera*)

**Brintiliornermut brintillu atorneqarnissaanut illoqarfinni imermit nukissiornermik pilersorneqartuni nukiup atorneqanngitsup atornissaanut Ilulissani misiliutaasumik suliniuteqarnissamut pilersaarummik Naalakkersuisut UPA 2018-imut saqqummiussinissamik peqquneqarnissaat pillugu Inatsisartut aalajangiiffigisassaattut siunnersuut.**

(Inatsisartunut ilaasortanit Debora Kleist, Anders Olsen, Vivian Motzfeldt, Bendt B. Kristiansen aamma Mala Høy Kúko)

**Akissuteqaat**

(Inuusutissarsiornermut, Suliffeqarnermut, Niuernermit Nukissiuuteqarnermullu Naalakkersuisoq)

**Siullermeerneqarnera**

Aallarniutigalugu Naalakkersuisut siunnersuummut qujassuteqarput.

Brint tassaavoq teknologii pissanganartoq, inuit ilaasa siunissami nukissiuutitut atugaalissasorisaa. Taamaattorli aamma nunarsuarmi brint suli annertuumik misileraaffigisamiippoq. Taamaattumik nalornissutit assigiinngitsut ineriartortitsinermilu aningaasartuutit teknologiip taassuma ineriartortinneqarnerani tassunga suli atapput.

Brintiliorneq pillugu misileraataasumik taamanikkut iluatsilluartuunngitsumik suliniuteqarlutik Nukissiorfiit siusinnerusukkut misiliisimapput. Taamaattumik suliassa qarfimmi piginnaasat pisariallit maannakkut piginagit Nukissiorfiit nalunaarsimapput.

Siunissami ilaanni brintip Kalaallit Nunaata nukissiornermik aqqissuussineranut ilaalernissaa pisinnaalluarsinnaavoq. taamaattumik teknologiip ineriartuuartinnera qanimut malittarisariaqarparput, aningaasaqarnermillu misissueqqissaarnerit tunngavigalugit brintip Kalaallit Nunaata nukissiornermik aqqissuussineranut ilanngussinnaanera isummerfigissallutigu.

Nukissiornermik immikkoortortamut pilersaarummik nutaamik maannakkut suliarisaasumi, 2017-imi Ukiakkut Ataatsimiinnermi saqqummiunneqassasutut naatsorsuutigisaasumi allatut qinigassatut ataavartuusutut nukissiorfiit piffissamut ungasinnerusumut takorluugaasup ilaattut ilanngunneqarumaarput.

Tamanna tunngavigalugu siunnersuutip itigartitsissutiginiissaa inassutigineqarpoq.